

Regio.

Situs.

Celi temperies.
Soli fertilitas.Animalium va-
rietas.

CHINAE Regnum amplissimum ac potentissimum, Incolæ *Tame*, & seiplos *tangis* vocant. Ptolemæus vel hos, quod quidem Ortelio placet, quem plerique sequuntur, vel vicinos Cataienses, quod magis probat Mercator, vocat *Sinas*. Sita est autem Regio omnis ad Oceanum Eoum, & ab Ortus Solis terrarum extrema putatur. Fines ejus ab Oriente Mare Eoum, Cauchinchina Provincia a Meridie; qua Occidens est, Brachmanæ: qua Septentrio sunt Tartari, gens bellicosissima, a quibus Montib. & muro longissimo discluditur. In universum autem cinctus ille sive ambitus Muri Montiumq; ad 10 Milliaria protenditur. Historici Chineses murum hunc ante annos ducentos a quodam Rege, Tzintzoo nomine exstructum memorie prodiderunt, postquam hujus Regionis incolas a Tartarorum tyrannide, quam xciij annos perpassi fuerant magna prudentia liberasset. Regio Cæli & Soli temperie, nec non Hominum industria, omnium rerum ferax. Habet enim homines minime desidiosos, sed labori assuetos: quibus nihil indignius videtur, quam vitam in otio transigere. Hinc fit ut nullus totius tractus angulus non aliquid producat. Loca arentia tritico & Hordeo conserunt, Humida, Plana, aut Palustria, Oryza, cujus quater uno anno satio est: Colles Montesq; Pinetis abundant, quibus interserunt Panicum vel Legumina. Nullus itaque locus, nullus Ager infrugifer: & ubique Horti, Rosæ, & varium genus Florum Frugumque. Lini etiam frequentes sunt Segetes, & Arbuta Moro confita, ad nutriendos Bombyces. Auri præterea, Argenti, Aëris, Ferri, aliorumque Metallorum, Gemmarum, Unionum, Musci, Saccari, Rhabarbari magna copia: præstantissimum habetur, id quod istinc per Persiam terra ad nos affertur: Mare enim multum virtutis illi adimere putant. Profert & hoc Regnum Lignum singulariter medicum quod a Chinesibus *Lampalam*, a nostris *Radix China* dicitur: estque ejus usus per totam Indiam frequentissimus contra quævis Apostemata, Paralysem, & Morbum Gallicum. Ejus Radix dura est & ponderosa atq; albi coloris. Pecorum in Montib. & Pratis greges infiniti. Silvas & Nemora incolunt Apri, Vulpes, Lepores, Cuniculi, Zebellini, Martes, aliaque id genus Animalia, quorum pelles in vestimentorum usum expetuntur. Horum jucunda hic utilisque venatio est. Avitij generis mira copia, præsertim aquatilis, cujus tanta multitudo & præcipue Anatum, ut in urbe Canton, ex minoribus huius Regni una, decem vel duodecim millia uno die absumantur. Quatinus autem hæc Regio Animalium ferax sit, arte tamen hanc feracitatem adaugent hoc artificio. Vere duo aut tria millia ovorum fimo condunt, cujus calore suo tempore erumpunt Anatum pulli.

Idem